



Sud Bosne i Hercegovine
Суд Босне и Херцеговине

Broj: SI 3 IŽ 030668 18 IŽ
Sarajevo, 09.10.2018. godine

Sud Bosne i Hercegovine u Sarajevu, u apelacionom upravnom vijeću sastavljenom od sudija, Srete Crnjak, predsjednika vijeća, Dinke Bešlagić-Čovrk i Vesne Trifunović, članova vijeća, odlučujući o žalbi Nezavisnog bloka, Sarajevo Dolina 11 i Kasumović Fuada, Zenica, izjavljenoj protiv odluke Centralne izborne komisije Bosne i Hercegovine, broj: 01-02-868/18 od 21.09.2018. godine, u pravnoj stvari izricanja novčane kazne, u nejavnoj sjednici održanoj dana 09.10.2018. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđena je odgovornost političkog subjekta Nezavisni blok iz razloga što se Kasumović Fuad kao kandidat navedenog političkog subjekta za Predstavnički dom Parlamenta rne Skupštine BiH dana 13.09.2018. godine tokom pauze u snimanju debatne emisije na NI televiziji, zbog prijetnji upućenih pristalici drugog političkog subjekta, prekršio pravila ponašanja u izbornoj kampanji iz člana 7.3 stav (1) tačka 4) Izbornog zakona pa im je na osnovu člana 6.7 stav (1) tačka 1. i primjenom člana 19.9 stav (1) tačka g) Izbornog zakona BiH izrečena novčana kazna i to:

- političkom subjektu Nezavisni blok u iznosu od 1.000,00 KM, i*
- Kasumović Fuadu, kandidatu političkog subjekta Nezavisni blok za Predstavnički dom Parlamentarne Skupštine BiH, u iznosu od 1.000,00 KM.*

Nezavisni blok i Fuad Kasumović su blagovremeno uložili žalbu na navedenu odluku. U žalbi, navode da preinačenje rješenja OIK Novo Sarajevo doneseno bez mogućnosti da kao strana učestvuju u ovom postupku, da im nisu predloženi dokazi, tonski zapisi, zbog čega smatraju da je ovakva odluka politički motivisana, a da nema nikakvih pravnih argumenata da bi se žaliozi kaznili.

Centralna izborna komisija BiH je u odgovoru na žalbu predložila da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije Bosne i Hercegovine kojom je utvrđena odgovornost navedenog političkog subjekta i kandidata tog subjekta zbog prekršenih pravila ponašanja u izbornoj kampanji za Opće izbore 2018. Godine.

Naime, u konkretnom slučaju žalbom se neosnovano ukazuje da CIK BiH nije žaliteljima omogućio da kao stranka učestvuju u postupku te da im nisu predloženi dokazi kod činjenice da im je Općinska izborna komisija Novo Sarajevo prilikom rješavanja po prigovoru Saveza za bolju budućnost provela kompletan postupak I žaliteljima kao i ostalim strankama omogućila učešće u postupku.

Naime, nakon provedenog prvostepenog postupku Općinska izborna komisija je rješenjem broj 01-02-868/18 od 21.09.2018. godine odbila kao neosnovan prigovor SBB-a Fahrudin Radončić protiv Nezavisnog bloka Fuada Kasumovića zbog povrede Pravila ponašanja u izbornoj kampanji – “prijetnje pristalicama drugih političkih stranaka” na dan 14.09.2018. godine. Dakle, izjašnjenje koje je podnositelj žalbe Kasumović Fuad dostavio u prvostepenom postupku Općinskoj izbornoj komisiji podneskom od 18.09.2018. godine., potvrđuje relevantnu činjenicu koja se odnosi na saznanje žalitelja koji su dokazi provedeni u toku postupka, pa je CIK BiH kao drugostepeni organ samo, cijeneći ponovo sve činjenice i dokaze provedene u prvostepenom postupku koje su bile dostupne žaliteljima pravilno poništio navedenu odluku Općinske izborne komisije. Naime, pravilna je i zakonita odluka CIK-a BiH kojom je prilikom utvrđivanja odgovornosti žalitelja ocjenio da riječi ,“dobro pripazi što govoriš “ i “dobro me razumi,” a potom i psovke koje je izgovorio kandidat Nezavisnog bloka Kasumović Fuad kandidatu Saveza za bolju budućnost Damiru Anautu, predstavljaju nedozvoljeno ponašanje prema pristalicama iz drugih političkih subjekata u periodu izborne kampanje, čime su prekršena

pravila ponašanja u izornoj kampanji iz člana 7.3 stav (1) tačka (4) Izbornog zakona BiH.

Kada je u pitanju odmjeravanje novčane kazne, apelaciono vijeće nalazi da Centralna izborna komisija BiH pravilno cijenila težinu učinjenih povreda člana 7.3 stav 1. tačka 4. Izbornog zakona BiH i stepen odgovornosti žalitelja. Naime, članom 19.9 tačka g) istog zakona je propisano da će se za ovu povredu politički subjekt kazniti novčanom kaznom u iznosu od 1.000,00 KM do 10.000,00 KM, a stavom 4 navedenog člana citiranog zakona kazniće se i kandidat političkog subjekta novčanom kaznom od 1.000,00 KM do 5.000,00 KM. U konkretnom slučaju utvrđena je minimalna kazna od po 1.000,00 KM koja je određena u granicama propisanim zakonom, i ista je prema ocjeni ovog vijeća, srazmjerna učinjenom prekršaju, naročito imajući u vidu težinu učinjene povrede i činjenicu da žalitelji nisu povratnici u kršenju odredbi Izbornog zakona BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.

**PREDSJEDNIK VIJEĆA
S U D I J A
Sreto Crnjak**